

**Nioqutissanik eqqusuinermi akitsuutit pillugit Inatsisartut inatsisaata  
allanngortinneqarnera pillugu Inatsisartut inatsisaattut siunnersuut**  
*Aningaasaqarnermut Naligiissitaanermullu Naalakkersuisumit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap 24. oktober 2022-mi suliarinninnermini ilaasortarai ilaasortarai:

Inatsisartunut ilaasortaq Hans Peter Poulsen, Siumut, siulittaasoq  
Inatsisartunut ilaasortaq Jens Frederik Nielsen, Demokraatit, siulittaasup tullia  
Inatsisartunut ilaasortaq Asii Chemnitz Narup, Inuit Ataqatigiit  
Inatsisartunut ilaasortaq Mariia Simonsen, Inuit Ataqatigiit  
Inatsisartunut ilaasortaq Kuno Fencker, Siumut  
Inatsisartunut ilaasortaq Lars Poulsen, Siumut  
Inatsisartunut ilaasortaq Jens Napaattoq, Naleraq

UKA 2022-mi ulloq 4. oktober 2022 siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Siunnersuut nioqutissanik eqqusuinermi akitsuutit pillugit Inatsisartut inatsisaata immikkoortunik pingasunik allanngortinneqarneranut tunngavoq. Kaffinik, tiinik timmissanillu eqqusuinermi akitsuutinik atorunnaarsitsigallarneq, 2022-mi aningaasanut inatsimmik suliaqarnermi akuersissutigineqartoq, ataavartunngortillugu inatsimmut atuuttumut ilanngunneqassasoq siunnersuutigineqarpoq. Tamatuma saniatigut naalagaaffimmi tikeraarnermut atatillugu qamutit motorillit akitsuuserneqartussaataasut eqqukkallarneqartut akitsuuserneqartannginnissaat siunnersuutigineqarpoq. Akitsuusiinnginnissami piumasqaataavoq qamutit motorillit naalagaaffimmi oqartussanit nunaniluunniit allani oqartussanit eqqunneqarnissaat aammalu eqqunneqarnermik kingorna ullut 30-t iluini anninneqaqqinnissaat. Kiisalu inatsimmi § 3, nr. 1-ip inissitsitnera allanngortinneqassasoq siunnersuutigineqarpoq, tamatumani pineqarluni inatsisilerinikkut kukkunermik iluarsineq.

## **2. Siunnersuutip Inatsisartunit siullermeerneqarnera**

Siunnersuut siullermeerinninnermi tapersorneqarluarpoq, taamaattorli imarisaa innuttaasullu siunnersuummi pineqartut ataasiakkaanik oqaaseqarfigineqarput. Siunnersuutip immikkoortua siulleq tullerlu, kaffit, tiit timmissallu akitsuuserneqannginnerisa ingerlaannarnissaanut tunngasoq aammalu naalagaaffimmi tikeraarnermut atatillugu qamutit motorillit eqqukkallarneqartut akitsuuserneqannginnissaanut tunngasoq, ataasiakkaanik allannguutissatut siunnersuuteqarfigineqarlutik oqaluuserineqarput. Siunnersuutip immikkoortuata pingajua, inatsisilerinikkut kukkunerup iluarsineqarneranut tunngasoq, partiinit tamanit taparserneqarpoq.

## **3. Tusarniaanermut akissutit**

Tusarniaanermut akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasqaataanut naapertuuppoq.

## **4. Ataatsimiititaliap siunnersuummik suliarinninnera**

Ulluinnarni nioqqutissat akitsuuserneqannginnissaat partiinit nalinginnaasumik taparserneqartoq ataatsimiititaliamit maluginiarneqarpoq. Kaffit, tiit timmissallu akitsuuserneqannginnissaat siorna akuersissutigineqarallarpoq, maannalu inatsisissatut siunnersuutikkut matumuunakkut siunnersuutigineqarpoq akitsuusiinngikkallarneq ingerlateqqinneqassasoq aammalu nioqqutissanik eqqussuinermik akitsuutit pillugit Inatsisartut inatsisaanni ataavartunngortinneqassasoq.

Ataatsimiititaliamilli maluginiarneqarpoq nioqqutissat sorliit akitsuuserneqannginnissaat pillugu siunnersuutip imarisaata allanngortinneqarnissaa partiit akornanni ataasiakkaanik kissaatigineqartoq aammalu qamutinik motorilinnik akitsuuserneqartussaataasunik nunanit allaneersunik akitsuusiinnginnissaq pinngitsoortivinneqassanersoq apeqquserneqarluni.

### **4.1. Nioqqutissanik akitsuusiinnginnissaq**

Partiit tapersersuigaluartut nioqqutissat sorliit akitsuuserneqassannginnerisut aammalu nioqqutissat taakku suliareqqaarneqarsimasuussanersut taamaassannginnerisorluunniit oqallisigineqartoq ataatsimiititaliamit maluginiarneqarpoq. Tassunga atatillugu ilaatigut saqqummiunneqarpoq tunisassiassat suliareqqaarneqanngitsut akitsuusiinnginnerisigut najukkani aallarnisaasut tapersersorneqarsinnaasut aammalu suliffissanik nutaanik pilersitsinissaq periarfissiuunneqarsinnaasoq. Tamatumali kingunerissavaa nioqqutissat suliareqqaarneqarsimasut suli akitsuuserneqarsimanissaat.

Akitsuusiinnginnissamut partiit assut tapersersuinerat nunarsuatsinni aningaasat naleerukkiartornerisa kingunerisaannik akit qaffannerisa ataatsimoorluni annikillisarneqarusunnerannik tunngaveqartoq ataatsimiititaliamit maluginiarneqarpoq. Taamaattumillu ulluinnarni nioqqutissat suliareqqaakkat, soorlu kaffit, tiit timmissallu, akitsuutaasa peerneqarnerat innuttaasunut nalinginnaasumik iluaqutaassaaq.

4.2. Qamutit motorillit nunanit allaneersut akitsuuserneqannginnissaat Qamutit motorillit akitsuuserneqartussaataitasut, naalagaaffinnit assigisaannillu tikeraartoqarneranut atatillugu eqqunneqartut, akitsuuserneqannginnissaannut tunngatillugu taamatut akitsuusiinnginnissaq kikkunnut iluaqutissanngussanersoq siullermeerinninnermi nalornissutigineqalermoq. Qamutit motorillit naalagaaffinnit tikeraartoqarnermut atatillugu nunanit allanit eqqunneqartut akitsuuserneqannginnissaat eqqumiiginartinneqartoq ataatsimiititaliamit paasineqarpoq. Taamatulli allannguisoqarnissaa amerlanerussuteqarluartunit tapersorsorneqartoq ataatsimiititaliamit oqaatigineqassaaq. Assersuutigalugu isumannaallisaaneq eqarsaatigalugu qamutinik motorilinnik immikkut ittunik eqquassinissap naleqqussinnaanera siunnersuummi pineqarpoq.

#### 5. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassat siunnersuummut nalinginnaasumik nassuiaatini allaaserineqarput. Tassani allassimavoq kaffit, tiit timmissallu akitsuutaannik atorunnaarsitsinissamik siunnersuut iluanaarutissat 5,7 mio. kr.-inik ikileriarnerannik nassataqartussat tagginneqartoq, tamannalu 2022-mi aammalu 2023-mi aningaasanut inatsisini ilanngunneqareersoq. Siunnersuut pineqartoq innuttaasut aningaasaqarnerannut annikinnerusumik iluaqutaasussat tagginneqarpoq.

Siunnersuutit sinneri, naalagaaffinnit tikeraartoqarnermi qamutinik motorilinnik eqqussigallarnermi akitsuummik atorunnaarsitsinermut aammalu § 3, nr. 1-imi inatsisilerinikkut kukkuneramik iluarsinermut tunngasut, aningaasaqarnikkut kinguneqassanngitsut tagginneqarpoq.

#### 6. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqatigiinneersut, Siumumeersut Demokraatineersullu siunnersuut akuerineqassasoq inassutigaat.

Ataatsimiititaliami ikinnerussuteqartup Naleqqameersup siunnersuut itigartinneqassasoq inassutigaat.


Ataatsimiititaliami ikinnerussuteqartoq siuliani taaneqartoq inassuteqaammut atatillugu ikinnerussuteqarluni ima oqaaseqaateqarpoq:

*”Naalakkersuisut akitsuusersuinngiffiusussanut tulleriaarnermi siunnersuuteqarnerat Naleqqamiit isumaqatiginngilluinnarparput.*

*Innuttaasut nunatsinni aqqusineqaratilluunniit tamakkiisumik akitsuusersuiiffigineqarput. Piumasaqaatigineqarpoq ATV snescooterillu nunarput tamaat isigalugu inatsisitigut malitassaqarpoq sumiiffikkaartumik naleqqussaasoqarsinnaajunnaarlugu toqqammavilersorneqarsimallutik. Taamaammatt nunaqarfii isorliunerusullu immikkut aaqqiiffigisinaanngierarlugit immikkut taamatut aaqqiiniartoqarnera nuna allamiunut tunngasumut Naleraq pegataaniannngilluinnarpoq, nuna allamiunut taamaallaat periarfissiisumik.*

*Nunatsinni nunaqavissut immikkut taamatut biiliniq peqarsinnaanissaanik aqqutissiuus-  
sisoqarnissaa Naleqqamiit orniginarutipparpur.*


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.”



Hans Peter Poulsen  
Siulittaasoq




Jens-Frederik Nielsen  
Siulittaasup tullia



Kuno Fencker



Lars Poulsen



Jens Napaattoq



Mariia Simonsen



Asii Chemnitz Narup